

ԿԱՐԳ

«ԳԱԶՊՐՈՄ ԱՐՄԵՆԻԱ» ՓԲԸ «Ուսումնա-սպորտային համալիր» Հիմնարկի
ՀԱՆՐԱԿՐԹԱԿԱՆ ԴՊՐՈՑԻ ՍՈՎՈՐՈՂՆԵՐԻՆ ՈՒՍՄԱՆ ՎԱՐՁԱՎՃԱՐԻ ԶԵՂԶԻ
ՏՐԱՄԱԴՐՄԱՆ

I. ԸՆԴՀԱՆՈՒՐ ԴՐՈՒՅԹՆԵՐ

1. Սույն կարգով (այսուհետ՝ Կարգ) սահմանվում են «Գազպրոմ Արմենիա» ՓԲԸ «Ուսումնա-սպորտային համալիր» հիմնարկի (այսուհետ՝ Հիմնարկ) հանրակրթական դպրոցի (այսուհետ՝ Դպրոց) սովորողներին ամենամյա ուսման վարձավճարի գեղջի տրամադրման մրցույթի (այսուհետ՝ Մրցույթ) կազմակերպման հետ կապված հարաբերությունները:

2. Մրցույթը կազմակերպվում և անցկացվում է տարին մեկ անգամ, որի նպատակն է խրախուսել Դպրոցի սովորողների բարձր առաջադիմությունը և խթանել նրանց մտավոր, ֆիզիկական և հոգևոր ակտիվությունը:

3. Մրցույթն անցկացվում է յուրաքանչյուր ուսումնական տարվա ավարտից հետո, ոչ ուշ, քան հաջորդ ուսումնական տարվա սկիզբը:

4. Կարգը հաստատվում է, դրանում փոփոխություններ և լրացումներ են կատարվում «Գազպրոմ Արմենիա» ՓԲԸ հրամանով:

II. ՈՒՍՄԱՆ ՎԱՐՁԱՎՃԱՐԻ ԶԵՂԶԻ ՏՐԱՄԱԴՐՄԱՆ ՄՐՑՈՒՅԹԻ ՀԱՆՁՆԱԺՈՂՈՎԻ ԿԱԶՄԸ ԵՎ ԳՈՐԾՈՒՆԵՈՒԹՅԱՆ ԿԱՐԳԸ

5. Մրցույթը կազմակերպում և անցկացնում է Հիմնարկի տնօրենի հրամանով ձևավորված մրցութային հանձնաժողովը (այսուհետ՝ Հանձնաժողով):

6. Հանձնաժողովի կազմում ընդգրկվում են «Գազպրոմ Արմենիա» ՓԲԸ աշխատակազմի և Հիմնարկի համապատասխան աշխատողներ:

7. Հանձնաժողովի գործունեության կարգը (աշխատակարգը) հաստատվում է Հիմնարկի տնօրենի հրամանով:

III. ՈՒՍՄԱՆ ՎԱՐՁԱՎՃԱՐԻ ԶԵՂԶԻ ՏՐԱՄԱԴՐՄԱՆ ՄՐՑՈՒՅԹԻ ԹԵԿՆԱԺՈՒՆԵՐԻ ԱՌԱՋԱԴՐՄԱՆ ԵՎ ՀԱՂԹՈՂՆԵՐԻ ԸՆՏՐՈՒԹՅԱՆ ԿԱՐԳԸ

8. Մրցույթին կարող են մասնակցել Դպրոցի 4-11-րդ դասարանները ավարտած բոլոր այն սովորողները, ովքեր ամբողջ ուսումնական տարվա ընթացքում հանդիսացել են Դպրոցի սովորող և ունեցել են 9.0 և բարձր միջին գնահատական: Թեկնածուների առաջադրումն իրականացվում է համապատասխան հայտերի միջոցով՝ էլեկտրոնային (առցանց) ձևաչափով (հայտի ձևը հաստատում է Հանձնաժողովը):

9. Մրցույթի հաղթողի ընտրությունն իրականացվում է հետևյալ փուլերով.

1) բարձր կամ գերազանց առաջադիմություն (միջին գնահատականը՝ 9.0 և բարձր) ունեցող սովորողների ծնողներին կամ օրինական ներկայացուցիչներին Հանձնաժողովի անունից ուղարկվում է էլեկտրոնային հայտարարություն Մրցույթի անցկացման, պայմանների և ժամկետների մասին,

2) Մրցույթին մասնակցելու (որպես թեկնածու առաջադրվելու) համար սովորողի ծնողը կամ օրինական ներկայացուցիչը, սահմանված կարգի համաձայն, պետք է ներկայացնի համապատասխան հայտ և անհրաժեշտ փաստաթղթեր,

3) Մրցույթին մասնակցելու ցանկություն հայտնաձևելու և հայտը ներկայացրած սովորողները Հանձնաժողովի կողմից սահմանված ժամկետներում մասնակցում են ընդհանուր գիտելիքների ստուգմանը, այնուհետև՝ հարցազրույցի Հանձնաժողովի հետ:

Առարկաների ցանկը, որոնցից հաշվարկվում է միջին գնահատականն, ու անցկացվում է գիտելիքների ստուգում՝ ըստ դասարանների, յուրաքանչյուր տարվա համար սահմանվում է Հիմնարկի տնօրենի հրամանով:

Նշված չափանիշների՝

ա) ուստարվա միջին գնահատական (25%),

բ) ընդհանուր գիտելիքների ստուգման թեստի արդյունք (50%),

գ) հարցազրույցի արդյունք (25%),

հիման վրա Հանձնաժողովն ընտրում է ամենամյա ուսման վարձավճարի զեղչի տրամադրման մրցույթի հաղթողներին:

10. Հաղթող են ճանաչվում 9.0-ից բարձր միավոր հավաքած սովորողները, որոնց Հանձնաժողովի որոշմամբ տրվում է ուսման վարձավճարի զեղչ՝ 600,000 ՀՀ դրամի չափով («Գազպրոմ Արմենիա» կրթաթոշակ), բայց ոչ ավել, քան յուրաքանչյուր դասարանական հոսքից (տվյալ դասարանի բոլոր դասարանական խմբերը միասին) առավելագույնը երեքական սովորող, կամ 250,000 ՀՀ դրամի չափով («Ուսումնա-սպորտային համալիր» դպրոց կրթաթոշակ), բայց ոչ ավել, քան յուրաքանչյուր դասարանական հոսքից (տվյալ դասարանի բոլոր դասարանական խմբերը միասին) առավելագույնը տասնհինգական սովորող գալիք ուսումնական տարվա ուսման վարձավճարի համար: Ընդ որում, 600,000 ՀՀ դրամի չափով զեղչը տրամադրվում է գալիք ուսումնական տարվա յուրաքանչյուր կիսամյակից առաջ, երկու հավասար մասերով՝ 300,000-ական ՀՀ դրամի չափով:

11. Բացառիկ դեպքերում (միջազգային, հանրապետական օլիմպիադաներում, առարկայական և այլ մրցույթներում լավագույն արդյունք գրանցելիս և (կամ) մրցանակային տեղ զբաղեցնելիս, ինչպես նաև այլ բացառիկ դեպքերում), Հիմնարկի տնօրենի առաջարկությամբ, «Գազպրոմ Արմենիա» ՓԲ ընկերության համաձայնությամբ, մրցույթում հաղթող ճանաչված սովորողը կարող է ստանալ Կարգի 10-րդ կետում նշված զեղչի չափից ավելի զեղչ, իսկ լավագույն սովորողը՝ 1,500,000 ՀՀ դրամի չափով զեղչ («Հրանտ Թադևոսյանի անվան» կրթաթոշակ), որը տրամադրվում է յուրաքանչյուր կիսամյակից առաջ, երկու հավասար մասերով:

12. Գալիք ուսումնական տարվա 1-ին կիսամյակում 9.0-ից ցածր միջին գնահատական ունենալու դեպքում 600,000 ՀՀ դրամի չափով՝ զեղչ ստացողը զրկվում է 2-րդ կիսամյակի համար զեղչ ստանալու իրավունքից:

13. Այն սովորողները, որոնք չեն ստացել Կարգի 11-րդ կետում նշված զեղչը, կամ ամբողջ ուսումնական տարվա ընթացքում, հանդիսանալով Դպրոցի սովորող, չեն ունեցել 9.0 և բարձր միջին գնահատական, սակայն ուսումնական տարվա ընթացքում ունեցել են կրթության, սպորտի, արվեստի կամ այլ բնագավառներում ակնառու հաջողություններ և ձեռքբերումներ, կարող են ստանալ զեղչ՝ 250,000 ՀՀ դրամի չափով՝ գալիք ուսումնական տարվա ուսման վարձավճարի համար:

14. Այն սովորողները, որոնք, մասնակցելով մրցույթին, չեն ճանաչվել հաղթող, կամ ամբողջ ուսումնական տարվա ընթացքում, հանդիսանալով Դպրոցի սովորող, չեն ունեցել 9.0 և բարձր միջին գնահատական, սակայն ուսումնական տարվա ընթացքում ունեցել են ակնառու հաջողություններ և ձեռքբերումներ, կարող են Հանձնաժողովի որոշմամբ ստանալ զեղչ՝ 250,000 ՀՀ դրամի չափով՝ գալիք ուսումնական տարվա ուսման վարձավճարի համար:

Սույն կետում նշված զեղչի տրամադրման կարգը հաստատվում է «Գազպրոմ Արմենիա» ՓԲԸ «Ուսումնա-սպորտային համալիր» հիմնարկի տնօրենի հրամանով:

IV. ԱՐՏՈՆՈՒԹՅՈՒՆՆԵՐԻ ՏՐԱՄԱԴՐՄԱՆ ԿԱՐԳԸ

15. Ռուսաստանի Ի.Մ.Գուբկինի անվան Նավթի և գազի պետական համալսարանում Հիմնարկի Դպրոցի շրջանավարտների ուսումնառությունը խթանելու նպատակով յուրաքանչյուր ուսումնական տարվա սկզբում՝ մինչև տվյալ տարվա հոկտեմբերի 15-ը ընկած ժամանակահատվածում, Հանձնաժողովի կողմից անցկացվում է հատուկ մրցույթ, որում հաղթող ճանաչված ՀՀ քաղաքացիություն ունեցող, Դպրոցի կամ այլ ուսումնական հաստատությունից Դպրոց տեղափոխվող 12-րդ դասարանի սովորողը Կարգի 18-րդ կետում նշված պայմանագիրը կնքելու դեպքում որպես արտոնություն ազատվում է Դպրոցի 12-րդ դասարանում ուսման վարձավճարի վճարումից (այսուհետ՝ արտոնություն):

16. Մրցույթն անցկացվում է առավելագույնը 2 փուլով:

16.1 Մրցույթի 1-ին փուլին կարող են մասնակցել ՀՀ քաղաքացիություն ունեցող Դպրոցի 12-րդ դասարանի այն սովորողները, ովքեր նախորդ ուսումնական տարվա ընթացքում (11-րդ դասարանում) առնվազն 1(մեկ) կիսամյակ հանդիսացել են Դպրոցի սովորող և նախորդ ամբողջ ուսումնական տարվա ընթացքում ունեցել են 8.0 և բարձր միջին գնահատական:

16.2 Եթե մրցույթի 1-ին փուլի արդյունքներով հաղթողը չի որոշվում, ապա հայտարարվում է մրցույթի 2-րդ փուլ (ինչի մասին տրվում է համապատասխան հայտարարություն), որին արդեն կարող են մասնակցել ՀՀ քաղաքացիություն ունեցող 12-րդ դասարանի սովորողներ նաև այլ ուսումնական հաստատություններից, ովքեր ունեցել են 8.0 և բարձր միջին գնահատական: Սույն պարբերությամբ նախատեսված՝ այլ ուսումնական հաստատության սովորողը մրցույթում հաղթող ճանաչվելուց անմիջապես հետո ընդունվում է Դպրոց:

16.3 Առարկաների ցանկում, որոնցից հաշվարկվում է միջին գնահատականն ու անցկացվում գիտելիքների ստուգում, ներառվում են «Ռուսաց լեզու», «Մաթեմատիկա», ինչպես նաև «Ֆիզիկա» կամ «Քիմիա» առարկաները՝ մրցույթի մասնակցի ցանկությամբ:

17. Մրցույթի մասնակիցներից ընտրվում է միայն 1 (մեկ) հաղթող, ով ազատվում է Դպրոցի 12-րդ դասարանում ուսման վարձավճարի վճարումից:

18. Մրցույթում հաղթող ճանաչված սովորողի (վերջինիս ծնողի/օրինական ներկայացուցչի) հետ, Կարգի 15-րդ կետում նշված՝ արտոնության կիրառումից առաջ, կնքվում է համապատասխան պայմանագիր (այսուհետ՝ Պայմանագիր), ըստ որի՝ սովորողը, որպես նպատակային ուսուցում, պարտավորվում է Դպրոցն ավարտելուց անմիջապես հետո ընդունվել Ռուսաստանի Ի.Մ.Գուբկինի անվան Նավթի և գազի պետական համալսարան, սովորել և ավարտել այն, ինչից անմիջապես հետո անցնել համապատասխան աշխատանքի «Գազպրոմ Արմենիա» ՓԲ ընկերությունում առնվազն 5 (հինգ) տարի ժամկետով: Ծնողն ու սովորողը սովորողի պարտավորությունների խախտման համար «Գազպրոմ Արմենիա» ՓԲ ընկերության առջև կրում են համապարտ պատասխանատվություն:

19. Պայմանագիրը Կարգի 15-րդ կետում նշված՝ արտոնության կիրառումից առաջ չկնքելու (դրա կնքումից խուսափելու) դեպքում սովորողը զրկվում է արտոնությունը ստանալու իրավունքից, իսկ Պայմանագրի պայմանները «Գազպրոմ Արմենիա» ՓԲ ընկերությունից անկախ պատճառներով խախտելու դեպքում սովորողը (վերջինիս ծնողը/օրինական ներկայացուցիչը) պարտավորվում է փոխհատուցել («Գազպրոմ Արմենիա» ՓԲ ընկերությունից վճարել) Դպրոցի 12-րդ դասարանի ուսման վարձավճարի գումարը: